

conditore jam dicto : quem regnare cœpisse tradunt anno periodi Iulianæ bis MDCCC LVI, Abrahamo Israëliticæ gentis archeo annum ætatis jam agente centesimum quadragesimum quartum, filio ejus Isaaco quadragesimum quartum, annis ante Cecropem primum regem Atheniensium quasi CCC, & ante excidium Trojæ DCLXXIV, ante Olympiadum Iphitearum principium MLXXXI. Ab hoc Inacho descenderunt clarissimæ familiæ principum Græciæ, eorum præsertim, qui in Peloponneso florere.

Athenien-
ses. Post Argivos emerere, & principem gloriæ locum tenuere Athenienses: quorum primus rex Cecrops cognomento διφύης ex Ægypto oriundus, Inacho annis CCCI recentior, initium duxit ab anno periodi Iulianæ ter millesimo centesimo quinquagesimo octavo, ante Trojæ excidium CCC LXXIII, ante Olympiadum exordium D CCLXXX. In hac civitate regnum tenuere reges XVII, per annos CCCC LXXXVII: in quibus ante alios claruere Erichthonius, Pandion, Erichtheus, Cecrops alter, Pandion alter, Ægeus, & reliquos celebritate nominis & actorum superans Theseus secundus Athenarum conditor, amicus & prope individuus comes Herculis Græcorum fortissimi ac maximè incliti, regum in ordine decimus. Postremus vero fuit Codrus, qui bello Doriensi pro patria se devovit, & occubuit tempore Saulis regis Israëlitæ, anno periodi Iulianæ ter millesimo, sexcentesimo, quadragesimo quinto. Post quem Archontes perpetui imperium Atticum tenuere per annos CCCXV, numero XIII: & ab hisce Archontes decennales VI I per annos LXX. Cum quorum fine cœpit in civitate Attica popularis libertas anno periodi Iulianæ quatermillesimo vicesimo sexto, à primi Cecropis initio D CCC LXVIII, post Olympiadum initium LXXXIV exeunte. Creati tum pro uno archonte novem annui pari potestate, quorum unus anno nomen dabat, ut bini consules apud Romanos. Atque hic status popularis duravit diutissime ad ultima civitatis istius tempora, maximeque floruit iis sæculis, quorum historiam Herodotus, Thucydides, Xenophon, Diodorus, Polybius suis scriptis complexi sunt. Cui statui leges dedere Dracon & Solon. vide Emmium in rep. Athen.

Thebani. Post Athenarum & Cecropis primi initium à Cadmo Agenoris Phœnicum regis filio conditæ feruntur Thebæ in Bœotia, decima, ut ajunt, generatione ante Herculem (certus enim annus non traditur) tempore Erichthonii quarti regis Attici, & Danaï decimi regis Argivi, à quo Cadmea arx nomen accepit: cui hoc singulare, quod primus literas & eorum usum in Græciam intulisse perhibeatur. Ante quem in Bœotia & regione Thebana Ogyges, sub quo diluvium ingens ac toti vicinæ calamitosum contigit, dicitur regnum tenuisse, & post eum quoque alii. Ex Cadmo descenderunt, Polydo-

rus, Labdacus, Laius, Oedipus regum miserimus, & duo ejus filii ex incesto nefario geniti, Eteocles & Polynices, atque ex hoc Therfander, Tisamenus. Autefion hujus stirpis regum ultimus ex oraculo regnum relinquens concessit ad Dorienses. Cujus filia Argia soror Thebæ nupta Aristodemo Heraclidæ mater fuit Eurysthenis & Proclis, qui duas familias regum Laconicorum progenuere. Post Autefionem Thebis regnarunt Damaschiton, Ptolemæus, Xanthius. Quo in monomachia à Melanthe Atheniensi interempto, regnoque abrogato, polyarchia Thebis est instituta annis LVII ante finem regnandi apud Athenienses. Polyarchiam denique excepit popularis libertas, quæ florētibus Græcorum rebus viguit, quamdiu Thebæ steterunt.

Corinthii. Corinthus ad Isthmum Peloponnesi sita, quondam Ephyra nuncupata, diu ante & post bellum Trojanum paruit regibus Argivis, & Mycenæis. Deinde Bacchaidæ illic imperium oligarchicum tenuere: & horum dominatu tandem abrogato, Prytanibus ex eodem genere resp. commissa. Quibus demum oppressis Cypselus Eetionis filius tyrannidem invasit, moriensque filio Periandro uni ex septem Græciæ sapientibus, Cyro Persarum & Cræso Lydorum regibus cœvo, eam reliquit. Eo mortuo, & extincto quoque paulo post fratris ejus Gordiæ filio, tyrannis excussa, & libertas restituta est, eaque perennavit, quamdiu Græcia fuit incolumis.

Arcades. Fuit & Arcadum genus longe vetustissimum in media Peloponneso, multis sæculis regum imperio subiectum usque ad bellum secundum inter Lacones & Messenios gestum: cujus belli anno tertio ob insignem perfidiam potestate exutus Aristocrates locum populari libertati dedit: fuitque ab eo tempore, quod congruit cum septimo anno libertatis Atticæ, una communis Arcadum respublica, quanquam sæpe diffensionibus agitata, in qua supremum concilium velut magnus senatus erat virorum X milium ex civitatum delectis conflatum, penes quod rerum summa fere solet esse; ut ex Xenophonte & Pausania discimus.

Messenii. Fuit & Messeniorum regnum in Peloponneso, Arcadiæ confine, sane antiquum, eversum à Lacedæmoniis, populisque in servitutem redactum.

Elei. Similiter Elei, qui ab Ætolis genus se ducere videri auebant, atque agrum optimum colebant, & per eum sparsim habitantes vita rustica magis quam urbana delectabantur, longo quoque tempore sub regibus aut principibus olim egere. E quorum numero Iphitus Praxonidæ filius ludos Olympios toti communes Græciæ, à Pelope quondam & Hercule inchoatos, sed postea neglectos, instauravit auxitque, & meliorem iis ordinem dedit, cum regula temporis: qui deinceps nunquam sunt intermissi, quolibet quadri-